

Pedrocca ima teppe tahidecca

1 Pedro

Pedropa Jesocca dodosse. Ajijaro ima teppepi dsama Asiahuaji madi-ridsamanajaridenidsa dsodo inajaro. Najaridenipa jodiodeni Jesodsa jehe quinajari. Nanajidso toquejenadsapa dsama onihi, onihihuaji madimana-hijine domo toccajari.

Pedropa najarideni bodideni acco icamabaquihijine dsodo inajaro. Jesocristocca toquejenarijine ocasserehe pohuadenidsa ssonariraha Pedro pocca dsodonijidsapi: Nema nehe ima bicanira tinamamana-dsanapona. Diodsara tetidsemanaji, najari.

Pedro nija najari

1 ¹¿Nija ohuemecotedeni? Ohuapi *Pedro, Jesocristocca dodosse oajaro. Tiadenipi Diocca tocatteljidsabaquuinaja tiquejenajaro. Jesocristodsa jehe tiquinajarodeni ticcadeni dsamadsa timadimanaporaha tiadeni totamohuabaquui-manadsa tijaribaquimanajarode. Nadsapi dsama Pontohuaji, Carasiahuaji, Capadosiahuaji, Asiahuaji, Bitiniahuaji timadiridsamanajarodenidsa occa ima dsodo onajaro. ²Abi Diopa maittaccadsama nahato tapodsa: –Occa madija tiquejenanijine –nadsa tiadeni tocatteljidsabaquui-pojari. Pohua Corimejine tibodideni inahireridsajaro. Jesocristo pohua emene toccajarojine naqui ticcadeni imasiri tomossijaro. Nadsapi tibodideni huireququiri nadsa Pohua Attidsa iboraququiri tiquinanijine tipajiramanani.

Occa Abi Dio tiadenidsa ima bicanin anadsanapona. Tibodidenidsa

naqui pocca jonehe tojadsanapona, onajaro.

Dio ia tonassiajabaquihijine tohuini imadijaro

³Diopa ia Medsede Jesocristocca Abi. Pohuadsa etidsedsa ettipi: –¡Abi Dio bica tinani, deni tijani! –inana, onajaro. Pohuapa itohui huati cahanari canadsa Pohuajine ibodi dsati tojajaro. Pina issonapomajarossa inajaro. Jesocristo dsoque-dsa nahatonijarijine ettipi: –Ia naqui idsoqqueraha inahatonidsa imadipomanitohuia –inajaro. ⁴Najaro tohuini imadijaropi pajissa iadsa tojanitohui. Memehuaji Dio Pohua madihidsapi iadsa inananijinecca Pohuana ecahuajaro. Najaro iadsa da inanijinepi bica tanicca ponira. Totabaccoranijine ssamo tani, jicanijine naqui ssamo tani. ⁵Tiadeni Diodsa pajissa tiquinajaropi Dio pocca dacorehedsa tiadeni tohuacahua-baquui-dsanapojari. Pocca dacorehedsa timadimanadsapi nidsa dsama

jicanicca huada bacco tadsa pocca tossiejehe najorapojaro tiadenidsa tojanitohui.

⁶Najarotohui tetidsemaneri naraha ajijaro dsamadsa timadimanaccadsapi ocasserehe tinahanamanaccanitohui. Naraha nema nehe tetidsemaneri nana. ⁷Ticcadeni jehenijipi pina orossa najaro. Tiadenidsa ocasserehe ssonarijaropi ticcadeni jeheniji nattome najaro. Najaropi pina dsippodsa oro nattome najarossa najaro. Oropi dsippo ppoconijine totabaccora-gerani. Bica tehe toja tani. Ticcadeni jeheniji naqui ocasserehedsa nattome nadsa dacoradsapi pina oro bica tajarossa najaro. Naraha oropi ajimani, jicaca tani. Ticcadeni jehenijina denima bica tajararo. Jicaquera tani. Jesodsa disseraqquri tiquinadsapi nidsa Jesocristo jidsera nanidsapa Diopa tiadenidsa huatidse-dsa ajama nahitohui: –Jehe, bicaqquri tiquinani. Ticcadeni jeheniji ponima toja-gerani. Occa deni tojehe, occa dacorehe tiadenidsa tojaji –nahitohui Abi Dio.

⁸Tiadenipi Jesocristo qqui tiquinapojararaha pohuatohui tetideni huanaqquri najaro. Jidapana naco pohua qqui tiquina-jararaha pohuadsa pajissa tiquinajaro. Nema nadsapi tibodidenidsa huatidsehe imeni anijaro. Najaro huatidsehepi pina ajijaro namicca huatidsehessa nejerani. Najaro huatidsehe tecomeramananijine naqui tettidenidsa pajira-gerani. ⁹Jehe, Jesocristodsa jehe tiquinajarojinepi Dio tiadeni tonassijabaqquihitohui. Najarotohui tetidsemaneri najaro.

¹⁰Maittaccadsama Dio Atti cacomeraqquri najaridenipa Dio madija inassijabaqquihijinecca ima mittamanahissa tahijine tohuini

quinadsa Dio Atti dsodo napojarocca hua hua nimanimanacca najari. Icassiejeranijinecca ima ehecomeridsamana nadsa naqui: –Dio madijadsa huati cahanari canadsa pocca tossiejehe da inanitohui –quiquinanajari. ¹¹Naraha Cristo-Mesia namihuaji ccaronajara-cadsa Pohua Corimepa Dio Atti cacomeraqquri najaridenidsa pocca ima ahuato inanapojaro: –Tiadeni Idinide Cristo-Mesia ajijaro namidsa ocasserani ahuahitohui. Dsotodepa Dio pocca dacorehe, pocca deni tojehe pohuadsa inanitohui –napojari. Naraha Cristo-Mesia tahimari pohuadenidsa ahuato tanijine disseraqquri najari. Attidenipa: –¿Nejecojari madijadsana Mesia tojapadsaja? ¿Nejecoma nadsa Mesia ccajonapadsaja? –quiquina-najari. ¹²Cristo-Mesia tahimari ecomeramana-pojaropi pohuadeni madimanadsa tojanijine jerani, dsotodedeniccadsana tojanijine. Djijine pohuadenidsa ahuato inanapojaropi tiadenidsana pajissa tojajaro-paji. Aja Dio memehuaji madijari Pohua Corime namihuaji dosse inaronadsa Pohua Atti maridedeni bodidenidsa tojaridsajaripajade. Nadsapa pocca dacorehema *Jesocristo tahimari icassiejeranijinecca tiadeni mari mari totocanabaqquimana najaride. Diocca dodosse tabaqqui memehuajicca naco najaro ima bicani qqui toquinahijine tohuini najonamanajari.

**Imasiri jirehe
timadimananijine Dio tiadeni
tocattejidsabaqqujari**

¹³Jehe, icassiejeranijinecca ima timittamanadsapi najarotohui

tinajoramanehe timadimanaji. Ima bicani tinanamananijine tibodideni huatonissa taji. Nidsa Pohua Bedi Jesocristo jidsera nanidsapa Dio pocca biquehe onihi onihi tiadenidsa da inanitohui. Najarotohui tibodideni najorana, onajaro. ¹⁴Tahidepi Jeso tahimari icassiejeranijinecca ssamoqquri tiquinadsa tabaccora tanicca tohuini tiquinehe timadimanapora jidapapi nema tiquinejeraji. Dio Attidsara iboraqquri tiquinaji. Pina ejedeni imehideni attidsa iboraqquri najarissa tiqinanijine, onajaro. ¹⁵Diopa pocca madija tiquejenanijine tiadeni tocattejidsabaqqujari. Puhuapa imasiri ssamo taja najari. Puhua bodipa ssiaja huire tajari. Nema nadsapi tiadeni naqui tibodideni ssiaja huire tadsa imasiri jirehe timadimanaji. ¹⁶Aji Dio Pohua Atti dsodo nanidsapi ajima nani: –Tibodideni ssiaja huire tadsa imasiri jirehe timadimanaji. Pina Ohuassa tiquinaji. Ohuatti nema onajaropi obodi ssiaja huire tajaro. Imasiri ssamo onani –nahi nade Dio.

¹⁷Diopa nidsaranibote madijacca ima cattermade tojadsapa aja madija ima tabaccora tanicca inanamanajarodeni ojariadsa itide, pamahadsa itide huati tohuanahi najarahitohui. Aja madija ima tabaccora tanicca inanamanajarodeni huapimadsa najidsohue inassonarnitohui. Naraha bica tanicca inanamanajarodenidsana pocca daniji bicani inanantohui. Nadsapi Dio Puhuadsa: –Icca Abi Dio –tiquinadsapi ajijaro namidsa timadimanaccadsama Pohua noppine ticappinamanadsa Pohua Attidsara

iboraqquri tiquinaji. ¹⁸Tiadenipi ticcadeni ididenicca madie ponimaccadsa timadimanapojaro. Naraha najaro tinebomananijine Dio tiadeni todinibaqqujari. Nahatoqquri tiquinani: Dio tiadeni todinibaqquhijinepa timanaconedeni huatini ccara tanicca oro da inejerani. Plata da inejerani. Oro, platapi jicaca tani. ¹⁹Aji timanaconedenipi Jesocristo emene bicabotena da inajaro. Pina edede bedi bicabote imasiri manaconi tojahijine Diodsa da da quiqinanajarissa najari. ²⁰Jesocristopa dsama nahato-jeraccadsama madija Idinide tojahijine Dio inanajarapojari. Jidapanana dsama jicanijine tohuajirajonadsa tiadeni todinibaqquhijine ajijaro namidsa ccaronajari. ²¹Puhuapa tibodideni acco camadsa Diodsa jehe tiquinajaro. Diojine Jesocristo nahatonidsapa Dio pocca deni tojehe, pocca dacorehe puhuadsa inanajaro. –Ia naqui ia tonahatonibaqquihitohui –tiquinadsapi Dio Puhuadsa pajissa tiqinanissa tajaro.

²²Jidapana tiadenipi Diocca ima pajissaccadsa iboraqquri tiquinajaroline tibodideni tohuireridsajaro. Nema nadsapi Jesodsa jehe quinjari timecotedeni toquejenajaridenidsa pajissehera tohuati huanehedsa tetideni huanaqquri naji. Naraha tettetidenidsara tetideni huanaqquri nani ojari-jeraji. Tetideni cahanari canadsa timecotedeni tedseje acco acco titicanaridsera naji, onajaro. ²³Tibodideni Diojine cacajiqquimeradsapi pina tissonamanapomajarossa najaro. Pina ticcadeni abi, amidenijine madija tiquejenadsa tissonamanapojarossa nejerani. Ticcadeni abidenipa jicahitohui.

Naraha Diopa dsoqqe-jarahi. Pohua Attipi camittehe da inajaro. Pohua Atti cacajiquimera-jerani, nema dsanaponitohui. Najarojine tibodideni dsati tojajaro. ²⁴Najaro ima Dio Atti dsodo nanidsapi ajima nani:

–Madija huapimacca madiepi pina dserossa najaro.

Madijacca biquehe naqui pina mohuecca biquehessa najaro.

Dseropi amadsati dsequeri nadsa jica tani.

Mohue naco amadsati dsequeri nadsa catojaha jica tahi.

Madija naco pina najaro imassa quinajari. Madimanadsanapojarahi. Cacotadsapa jicahitohui.

²⁵Naraha Dio Attipi cacajiquimera-jerani, nema dsanaponitohui

–naponi nade Pohua Atti dsodo nanidsa.

Jehe, najaro Jesocristo tahimari icassiejeranijinecca tiadeni mari tocanabaquimanadsa pajissa tiquinajaro.

2 ¹Nadsapi Dio Attijine tibodideni dsati tojadsapi ticcadeni tabaccorehe nemanehetinebomanaji. Maidsehe naqui tinebomanaji. Tettideni bica taniccasda huati huati titiquina naraha ticcadeni madiepi tettidenissa nejerani. Najaro maidsehe naqui tinebomanaji. Madija pohua cajijari acconi naqui tedimana tejeraji. Ima ponimacca huapima huati huati naqui tinebomanaji. ²Dio Atti pajissacca ponira tohuina disseraquiri tiquinaji. Pina ejedeni tossonedsati imeni dsojorinitohui dissera tajarissa tiquinaji.

Huajjiradsa Pohua Attira titimittamana naji. Nema tiquinadsapi Diodsa ticcadeni jeheniji todacoranitohui. Tossiejehe naqui ticajimananitohui. ³Jehe, ia Medsedecca biquehe pajissa tecatamamanadsapi pohuapa bica tahi nahatoqquri tiquinani.

Jesocristopa pina siba bicabotessa najari

⁴Nadsapi ia Medsede Jesocristodsa tiajiramanaji. Pohuapa pina siba camitta tajarossa najari. Madijapa ettajomanaraha Diodsapa bica tajari. Pohuapa Diocca tocattejidsaniji, huapimadsa deni tojahijine. ⁵Tiadeni naqui Diocca daniji camittehe dsati ticajimandsapi pina siba camitta tajarossa tiquinani, Dio pocca odsa canahatonijine. Najaro odsapi tibodideninapaji. Najarodsas Dio Pohua Corime madidsajari. Tiadeni naqui pina *Diodsa dada toquimadedenissa tiquinajaro. Aji ticcadeni danijipi Dio Pohuadsa tetetidsemana najaro, Pohua Attidsa iboraqquri tiquinajaro najarona paji. Najarodsana Dio huatidsejari. Jesocristodsa pajissa tiquinajarojine ticcadeni daniji Diodsa pajiranissa tani. ⁶Aja Jesocristopa pina siba bicabotessa najari. Dio Atti dsodo nanidsa ajima najaro:

–¡Ticattomama canaji! Siba bicabote ocattejidsadsa odsapanani *Siodsa ohuattani. Najarodsas odsa canahatodsapidaco cajiranjine.

Najaro sibadsa pajissa quinaridenipa nidsa dsotode ponicca mamaisda tabaqqi toquejena-jarahitohui

–naponi nade Dio Atti dsodo nanidsa.

⁷Jehe, pohnadsa pajissa tiquina-dsapi pohnapa tiadenidsa pina siba bicabotessa najari. Naraha pohnadsa pajissa quina-jarajaridenipa ettajomanajari. Pina Dio Atti dsodo naponiccassa inanamanajaro.

Najaropi ajima najaro:

–Odsa sibadsa icanahatomaninjine nanahatodedenipa siba ojariepi ettajomanajaro.

Naraha dsotodepi najaro sibana odsa daco cajiranijine tojajaro.

⁸Dio Atti dsodo nani onihi naqui:

–Najaro sibapi madija inehedimabaqquihitohui
–naponi nade Dio Atti dsodo nanidsa.

Jehe, Diopa nama napojaria aja madija Jesocriso tahimaridsa pajissa quina-jaradsapa pina sibadsa tohuedima-manajarissa quinahitohui. Diopa nama quinahijine tahide nahato tapodsapa pohnadeni tedsejemacca ima inanajorapojaro.

⁹Naraha tiadenipi Diocca tocattejidsabaqquinaja tiquejenajaro. Diopa ticcadeni tamine deni tojajari. Tiadenipi pina Diodsa dada toqqumadedenissa tiquinajaro, Dio pocca dossenijidsa tidsepedeni ijimanadsanaponijine. Pocca madija tiquejenajaro. Pohnadsara iboraqquri tiquinajaro. Tiadenidsa: –Occa madija, occa todinibaqquinaja –najari Dio. Tahidepi dsidsinidsa timadimanaporaha jai tijenanijine tiadeni huahua tabaqquijari. Dio tiadeni nama tonanabaqquijaripa Pohna ssiejene bicabotedsa timadimananjine. Pohna tahimari bicabote deni

tojanicca tecomeraridsamananjine.
¹⁰Tahidepi ponima timadiridsamanaporaha jidapanana Diocca madija tiquejenajaro. Tahidepa Dio tiadenidsa huati tohuana-jararaha jidapapa tiadenidsa huati cahanari canahi.

Diopa timadimananissa tanijine tohuini najari

¹¹Ohuemecotedeni, titohuideni ohuati huana tani. Ajaro dsamadsapi timadimanadsanapo-jerani-tohui, pina dsama onihihuaji jai tijajarossa najaro. Nema nadsapi tiadenidsa ohuatti ajima onajaro: Tibodidenicca tabaccorehe ahuatodsapi poni tiquinaji. Najaro tabaccorehepi tibodidenicca jeheniji inassamorana. ¹²Ajaro dsamadsa timadimanadsapi Diodsa jehe quina-jarajarideni tedseje timadimananissa taccaji. Attideni tabaccora tadsa titahimarideni huati huati toquinadsapa: –Imasiri sseqquiri tiquinani –quinahitide naraha ima bicanira tinanamandsanapodsapi qqui toquinahitohui. Nadsapa nidsa dsotode Dio madija huapimacca ima cattemade tojadsapa aja ticcadeni madie bicani qqui toquinapojari attidenipa: –Diopa bica tahi, bica tahi –quinahitohui.

¹³Ia Medsededsa tijinedeni ima bica tanijinepi ajima tiquinaji: Madija cacahuadedeni huapima attidenidsa iboraqquri tiquinaji. Ticcadeni dsama cacahuade attidsa iboraqquri tiquinaji. Pohnapa tamine deni tojajari. ¹⁴Pocca dodosse tabaqqui dosse inaridsabaqquijari attidenidsa naqui iboraqquri tiquinaji. Pohnadenipa

cacahuade toquejenaridsadsapa
 madija tabaccorehe inanamana-
 jarodeni inajidsobaqqumana tahi.
 Naraha ima bicani inanamana-
 jarodenisana: –Jehe, tiadenipi
 bicaquiri tiquinani –quinajari.
¹⁵Diopa timadimananissa taniijine
 tohuini najari. Nema tiquinadsapi
 Diocca dosseniji ssamoquiri najari-
 deni ticcadeni madie bica tani qqui
 toquinadsapa joma quinahitohui.

¹⁶Pina madija tappa tabaqqui-
 hissa tiquinadsa timadimanaji.
 Tahidepi imasiridsa timadimana-
 poraha tiadeni tappa tabaqquijaro.
 Imasiri tiadeni tappa tabaqquiraha
 tettideni: –Tabaccorehe onanani
 oppinera tani –tiquinejeraji. ¡Poni!
 Diodsara iboraquiri tiquinadsa
 timadimanaji. ¹⁷Timadimananissa
 tadsa madija huapimadsa bica-
 qquiri tiquinaji. Timecotedeni aja
 Jesocristodsa jehe quinajarideni-
 dsa tetideni huanacquiri naji. Dio
 noppine ticappinamanadsa Pohua
 Attissa tinanamanaji. Tamine deni
 tojahicca noppine naquí ticappina-
 manadsa pohua attidsa iboraquiri
 tiquinaji, onajaro.

**Tiadenidsa najidsohue
 ssonariraha mohuaradsa
 tinahanamananijine**

¹⁸Ajijaropi *madijacca dodosse
 tarabidsajine tiquejenarodeni-
 dsa dsodo onajaro: Tiadeni dossede
 attidenidsa iboraquiri tiquinaji.
 Tettideni bica tadsa pohuadenidsa
 huati huati tiquinaji. Dodosse-
 denipa bicaquiri naja bica-
 qquiri najaraja camajari. Naraha
 bicaquiri najari attidenidsa,
 aja huadiquiri najari attideni-
 dsa naquí iboraquiri tiquinaji,

onajaro. ¹⁹Ajima tiquinanina bica
 tajaro: Diodsa ibora tinadsa taba-
 corehe tinana-jeraraha tiadsa
 najidsohue ssonaridsapi mohuara-
 dsa tinahanajaro. ²⁰Naraha aji
 tabaccorehe tinanajarojine tiadsa
 najidsohue ssonaridsa mohuaradsa
 tinahanaraha ¿Dio tiadsa: –Jehe,
 bica tinani –nahijineco? Nohue-
 rahi. ¿Madija naco tiadsa: –Jehe,
 bica tinani, daco tijirani –quina-
 hijineco? Nohuerahi. Najaropi tia
 tabaccorehe tinanajaro manaconi.
 Naraha aji ima bica tinanajaro-
 jine najidsohue tiadsa ssonaridsa
 mohuaradsa tinahanadsapi tijine
 Dio huatidsehitohui. ²¹Diocca
 madija tiquejenadsapi ocasserehe
 tiadenidsa ssonariraha mohuara-
 dsa tinahanamananijine Dio tiadeni
 tocattejidsabaqquijari. Jesocristopa
 titohuideni ocasserani ahuapojari.
 Pocca madiedsa Dio jipa tahicca
 nohue inajaro. Nadsapi pina pohua-
 jinessa tinanamananijine dissera-
 qquiri tiquinaji. ²²Pohuapa imasiri
 inana-jerani. ¡Nohuerajaro! Madija-
 deni icamaidsabaqqui-jarajari.
 ¡Nohuerahissa tajari! ²³Itamasso-
 manadsa naco pohuapa tatamasso
 najarade. Najidsohue tonahanadsa
 naco manaco pohuadenidsa jara
 jara najarade. Imehi Diodsa: –Abi,
 ohua tecahuaji –nanaja nadsapa
 didi najari. Dio Puhuana madija
 huapimacca ima cattemade nahato
 tajari. Puhuajine pajiranissa tajaro.
²⁴Jesocristo pohua asiredsa icca
 imasiri ssonaridsapi *ahua por-
 macossanidsa dsoqquejari. Nama
 nadsapa pohuajine iapi imasiridsa
 ecotajaro. Madie bica taniccadsana
 imadijaro. Puhuapa biquerajarijine
 iapi ibicajaro. ²⁵Tahide tiadenipi

pina edede jano toquejenajarissa tiquinajaro. Tiadeni Cacahuadessa huajiqquiri tiquinaraha jidapanana Jesocristodsa jai tijaqquinjaro. Pohnuapa edede cacahuadessa najari. Nocco panadsa tiadeni tohuacahua-baqquijari.

**Amoneje maqquideje
cajimanajaro, maqquideje
amoneje cajimanajarideni
madimanahissa tahijine**

3¹⁻² Jehe, tiadenidsa occa ima onihipi ajima najaro: Amonejedeni maqquideje ticajimanadsapi ticcadeni maqqui attidsa iboraqquri tiquinaji. Ticca maqqui Jesocristodsa jehe najarajaridsa timadidsa naqui pohua attidsa ibora tinaji. Pohnuadsa Jesocristo tahimari huati tinanitide, huati tina-jeranitide naraha ticca madie bica tani qqui tadsapa pohua naco Jesocristodsa jehe nahitide, onajaro.

³ Jehe amonejedeni, tessiredeni bica tanijine tohuinira tiquinejeraji. Bicaqquri tiquinanijinepi pina titatideni conani ticohuamanajaro, dsibehi tanicca oro nahatoni timattodenidsa huanajaro, etero huatini ccara tanicca tedsamanajaropi Diodsa ponimassa najaro.

⁴ Bicaqquri tiquinanijinepi tibodidenina paji. Tettideni bica tadsa joneqquri tiquinana. Najaro biquehepi totabaccorarera tani. Najarona Diodsa denima bica tajaro. ⁵ Maittaccadsama Dio Attidsa iboraqquri najarodenicca biquehepi ponideni bodinina paji. Diodsa jehe quinanissa tadsapi ponidenicca maqqui attidsa naqui iboraqquri najaro quinade. ⁶ Maittaccadsama amoneje madijaro Sara nema

napojaro. Ponicca maqqui Abarahao attidsa ibora tajaro. Pohnuadsa:

– Ohua medsede – naneje najaro quinade. Nadsapi tiadeni naqui bica taniccara tinanamanadsapi pina Sara potemanissa tiquinanitohui. ¡Ticappinamana tejeraji! onajaro.

⁷ Maqquideje tiadeni naqui amoneje ticajimanadsapi ticcadeni amoneje tecahuamananissa taji. Tibodideni huatona: Ponidenipi pina tiadenissa quina-jerani. Ponidenicca dacorehepi ajimani, tiquinana. Nadsapi ponidenidsa bicaqquri tiquinaji, onajaro. Diopa ponidenidsa pocca daniji bicabote da inanitohui, pina tiadenidsa da inajarossa nanitohui. Najaro camittehe jiquejeraniccapi ticca amonejedsa, tiadsa tojanitohui. Jehe, poni tadsajani timadimananissa tadsapi Diodsa huati tiquinadsa tettideni mittahitohui.

**Ima bicani inanaraha
ocasserehe iadsa ssonari tani**

⁸ Jehe, tiadeni huapimapi ticajonerara canadsa timadimananissa taji. Tibodideni ojariqquinissa tadsa jehe ticanirere canaridseraji. Tetideni cahanerara canadsa pina timecotedenidsa tetideni huanaqquri najarossa tiquinaji. Huapimadsa bicaqquri tiquinaji. – Ohuapideni ojan – tiquinejerana, onajaro. ⁹ Nadsama madija tiadenidsa tabaccorehe inanamanadsa naqui manaco pohnuadenidsa tabaccorehe tinanamanajeraji. Tiadeni totamasso-baqquimanadsa naco manaco titamassobaqquimanajarajo. Ajima tinanamananina bica tani: Pohnuadenidsa ima bicanira tinanamanaji. Tettideni bica tadsa

pohuadenidsa huati huati titiquina nana. Nema tinanamanadsapi Dio tiadenidsa ima bicani inananitohui. Najarojine tiadeni tocattejidsa-baqqijari. ¹⁰Jehe, najaro imapi Dio Atti dsodo napojarodsa ajima najaro:

–Madijapa ajijaro namidsa madihissa tahijine tohuini najari,
pocca madie bica tadsa huati-dsehema madihijine tohuini najaripa
imasiri huatira, maidsehe huatira tana.

¹¹Najaripa tabaccorhedsa tohuajihi nana. Ima bicanira ihinanaridsa nana.

Madija huapimadsa jone taha madina.

¹²Ia Medsedepa ima bicanira inanamanajarodeni ecahua-baqqijari.

Diodsa huati toquinadsa naco poccadeni huatinaja mitta-hitohui.

Naraha madija tabaccorehe inanamanajarodenisapa Dio jipera tadsa pohuadenidsa huadibote najari

–naponi nade Dio Atti dsodo nanidsa.

¹³Jari, tibodideni huatomanaji: Ima bicani tinanamananijinera dissessera tinadsapi ¿nejecojari tiadenidsa tabaccorehe inananijine pajirahi? ¹⁴Naraha ima bicani tinanamanajarojine ocasserani temanadsapi Dio tiadenidsa ima bicani inananitohui. Madija noppinedeni ticappinamana tejeraji. Ocasserehe tiadenidsa ssonaridsa naqui tijabojomana tejeraji. ¹⁵Pina tibodidenidsa ajima tiquinaji:

–Jesocristo, tiapi ohua Medsede. Tiadsara ibora odsanaponijine –titiquina nana. Madija tiadenidsa attideni: –¿Timadinissa tadsapi nejecora ticajinijine tohuini timadijaro? –quinadsapa pohuadenidsa tecomeramananijine tibodidenidsa najorapodsapi pohuadenidsa tetecomeramana naji, onajaro. ¹⁶Tecomeramanadsa naqui tohuati huanehema, tettideni bica tadsa huati huati titiquina nana. Jehe, Jesocristodsa jehe tiquinadsapi tibodideni huireququiri nehe timadimanana, imasiri tinanamana-jeranijine. Nema tiquinadsapi imasiri huahuatidedenipa tiadenidsa ima inanamanaraha pohuadeni atti pajissa toja-jeradsapi pohuadenina cappinamanahitohui.

¹⁷Dio jipa tadsapa ocasserehe tiadsa ssonaridsa tinahananitohui. Tabaccorehe tinanajarojine ocasserehe tinahanadsapi epeje, tijine tabaccora tadsa. Naraha ima bicani tinanajarojine ocasserehe tinahanadsapi epeje, tijine Diodsa bica tajaro. ¹⁸Jesocristopa icca imasiri manaconi ocasserani ahuadsa dsoqqejari. Dsoqqehei ojari-rahaha pohuajine imasiri manaconi pajiranissa tehe nema dsanaponitohui. Pihuapa imasiri cappiraraha imasiri inanamanajarodeni-tohui ocasserani ahuajari. Nama najaripa Diodsa ia bacco inanijine. Pihuapa pina madijassa nadsa assire dsoqqueraha pohua corime Diodsa tomadinipomajari. ¹⁹Pohua corimepa jicapojarideni corimedeni maride toccajari. Najaridenipa najidsohuedsa toquejenahijine Dio icahacossabaqqijari. ²⁰Pohuadenipa maittaccadsama *Nohue madiccadsa

madimanapojari. Dio Attidsa iboququiri najari. Naraha Diopa huadi-jaradsa bodideni cacajiquimerahijine mohuaradsa tohuideni madicajari. Nohue canoa imenibote cobade tojjaccadsapa Dio pohuadeni-tohui madiraha bodideni cacajiquimera-jaradsapa ppanidsa tojjicajari. Naraha madija 8 quinahana canoa imenibote passodsa tocatabo-macossajarodsa tocassiejerajari. ²¹Najaro imapi pina icassiejeranijinecca imassa najaro. Jidapana iapi Jesodsa jehe inadsa passodsa *totopa icajijarojine Diocca najidsohue dsori icanirenitohui. Passodsa ia topa dsanajaropi essire obani toccanijine jerani. Ibodi cacajiquimeradsa Diodsa huati inadsa ettipi: –Abi Dio, ojine tabaccora tajarodsa: “Epeje, ohuati ajimani” taji. Nani obodi bica, huire tanijine –inadsana totopa icajijaro. Jesocristo nahatonijarijine Dio ia tonassijabaquijari. ²²Jesocristo nahatonidsapa memehuaiji toccamacossanijari. Huapimadsa deni tojadsapa Dio inori nahatonihuaiji huittarijari. Nahidsa huittari-dsapa Diocca dodosse tabaqqui memehuaijiccadsa dosse dosse najari. Ahuatoraququiri najarideni deni tojehe cajimana, dacorehe cajimana naraha najaridenidsa naco Jesocristo dosse dosse najari.

Diodsara disseraqquri tiquinaji

4 ¹Jehe, Jesocristopa pohua assiredsa ocasserehe imeni inahanajaro. Nema nadsapi tiboidenidsa tinajoramanadsa ajima tiquinaji: –Pina Jesocristossa onanijine ocasserehe ohuadsa ssonaridsa nema nehe onahanana –tiquinaji. Ocasserehe mohuaradsa

tinahanamanadsapi tabaccorehe tinebomanani ahuato tajararo. ²Nadsapi ajijaro namidsa timadimanaccadsapi tabaccora tanicca tohuini tiquinejersa timadimananitohui. Dio Pohua tohuini nahiccara titinanamana nanitohui. ³Tahide timadimanapodsapi Diodsa jehe quina-jarajaridenicca tabaccorehessa tinanamanadsa timadimanapoccade. Pina tessiredeni totabaccoranijinecca tohuini titiquina najaro. Ticcadeni amoneje jeraraha tohuini tiquinajaro, ticcadeni maqqui jararaha tohui tiquinajari. Najaro huananehe tohuini titiquina najaro. Huananehe onihi tabaccora tanicca naqui tohuini titiquina najaro. Tinoccodeni jano tanijine tohuini titiquina najaro. Ejete tabaccora tanicca tohuini titiquina najaro. Dsoppi-nejedsa, siba nahatonidsa naqui: –Ia cacahuade –titiquina najaro. Najaro imapi Diodsa denima tabaccora tani. ⁴Naraha jidapanana ticcadeni madie dsatipi aja tabaccorehe tohuini quinajaridenidsa jidsa tani. Pohuadeni tedseje tiquejemamana-jeradsapi attideni tabaccora tadsa titahimari-deni huati huati quiquinanajari. ⁵Naraha tabaccorehe inamanajarodenipa Diodsa poccadeni tabaccorehe ecomeramananitohui. Diopa madimanaccajaridenicca ima, dsoqqemanapojaridenicca ima huapima cattemade najorajari. ⁶Nama nadsapa Jesocristo pohua pohua tahimari icassiejeranijineccadsa jicamanapojarideni mari icanabaquijari. Diopa dsoqqueheda assiredeni inajidsobaqquijaripa madija huapima dsoqquehe tonahanajonamanajari. Naraha Jesodsa jehe quinajari corimedenipa Diodsa madimanasanapohuitohui.

⁷Ajjaro dsamapi jicani tohuajira-jonani. Nema nadsapi tibodideni huatoma-mananissa tadsa tiadeni tecahuamanaji, imasiri tinanamana-jeranijine. Diodsa huatide naqui disseraquiri tiquinaji. ⁸Ima deni tojaniccapi tetideni cahanerara canaridsanijine. Najaro tohuati huanehepi imasiri inajica tani. ⁹Ticcadeni odsahuaji madija bacco najonadsa naco pohuadsa tetti-deni tabaccora tadsa huati tiquina tejeraji. –Nija, ticcamacossaji. Tijipaji –tiquinanina bica tani.

¹⁰Diopa tiadenidsa ima bicani inanajaro. Pohua Corimecca nahato-hue onihi onihi da inaridsadsapi ticajiridsamanajaro. Najaro daniji bicani ponima tinanamana-jerana. Najarodsa timecotedeni acco camade nahatoquiri tiquinana. Acco acco ticanaridseradsapi Diocca biquehe huapimadsa ahuato tanijine. ¹¹Madija maride nahatoquiri tiquinadsapi pina Dio Attissa najarora mari mari titiquina naji. Madija bijideni accode nahatoquiri tiquinadsapi Diocca dacorehema acco ticamabaquimanajo. Nema tiquinadsapi madija huapima qqi toquinadsa: –Jehe, Jesocristojine nama quinajari –quinahitohui. Nadsana pohuadeni naco Diodsa huatidsemanadsa: –Jehe, Diopa bica tahi, bica tahi –quinahitohui. Pajissa, Diopa bica tajari. Dacorehe cajih. Nama dsanapohuitohui. Pajissa nema nana.

**Tiadenidsa ocasserehe
ssonaridsapi
ticappinamana tejeraji**

¹²Ohuemecotedeni, titohui-deni ohuati huana tani. Tiadenidsa ocasserehe ssonarijaropi pina

dsipossa najaro. Ticcadeni jeheniji nattome najaro. Diopa tiadenidsa ocasserehe ssonarinijine ecossajeradsapi tinahanamananithui. Naraha tijabojomana tejerana. –¿Nejecotohui Jesocca ojaraha ohuadsa ima ssonarijaro? –tiquina tejeraji. ¹³Pina tetidsemanaji. Jesocristo naco ocasserani ahuajari. Pina tiadeni tinahanamanajarossa najaro inahanapojaro. Nidsa pohua ccanipomadsa pocca deni tojehe ahuato inanadsapi tetidsemaneri nanithui. ¹⁴Nadsama Jesocristo onidsa tiquejenarojine madija tiadenidsa attideni tabaccora tadsa atti atti quinadsa naco nema nehe tetidsemanaji. Dio tiadenidsa ima bicani inanajaro. Dio Corime Dacorabote tiadenidsa tojadsapa madi-dsanapohuitohui.

¹⁵Aji ocasserani tinahanamanajarocca ima huati huati onajaropi tabaccorehe tinanamana-jerana manaconi jerani. Madijapa tabaccorehe inanaridsamanani caji tani. Pina ijine ahuajari, botijari, imasiri tonanajari, madija ohuahacca imadsa quejemajari. Nama quinajari-densapi najidsohue ssonari tani. Naraha tiadenipi nema tiquinejeraji. ¡Poni! onajaro. ¹⁶Naraha Cristocca madija tiquejenarojine ocasserani tinahanamanadsapi ticappinamana tejeraji. Pina Diodsara tetidsemanadsa Pohuadsa: –¡Jehe, epeje, bica tani! Jesocca ojararojine ocasserani ohuajaro –titiquina nana, onajaro.

¹⁷Dio madija huapimacca ima cattermade tojahijinecca huada bacco tani. Tahidepi ia pocca madija iquejenajaro icca imaha icattermaponithui. Aji jidapana iadsa najidsohue sssonari najaropi

ajimani ocassera taraha nidsa dsotode Dio madija inassiaja-baqquihijinecca imadsa iboqquri najaridenidsana najidsohue denima oppina tanicca ssonarinitohui. A, pohuadenipa najaro najidsohue inahanamananijine pajiramana-jarahitohui, onajaro. ¹⁸Dio Atti dsodo napojarodsapi ajima najaro: Diodsa iboraqquri najarideni tocassiejerahijinepa najo taraha nema nehe inahanamanajaro. Naraha Diodsa iboqquri najarideni, aja imasiri ssequiri najarideni tocassiejerahijinepa pohuadenidsa denima najo tani. ¡Pohuadenidsapi ssamo tani! ¹⁹Nema nadsapi tiadenidsa ajima onajaro: Dio ecossanijine jipera tadsa tiadenidsa ocasserehe ssonariraha nema nehe bicanira tinanamana-dsanapona. Diopa tiadeni Nahatode. Pohuadsa: –Abi Dio, ohua tecahuaji –tiquinadsapi tiadeni tohuacahua-baqquihitohui. Pohuapa Pohua Attissa inanajaro.

**Jesocristodsa jehe
quinajarideni
madimanahissa tahijine**

5 ¹Ajjaro imapi *Jesodsa jehe quinajarideni cacahuadedenidsa dsodo onajaro. Ohuapi pina pohuadenissa onajaro, jehe quinajarideni cacahuade ojani. Ohuapi Jesocristo ocasserani ahuahi onocodsapi qqui onajarocca ohohuacomeraridsa najaro. Nidsa pohua ccnipomadsa pocca deni tojehe tojaridsadsapi pohuadenidsa, ohuadsa naqui tojanitohui. Nema nadsapi pohuadenidsa ajima onajaro: ²Ticcadeni mamari tabaqqui Jesodsa jehe quinajarideni tecahuabaqqui-manahissa tajo. Dio Pohuajine pocca madija

cacahuade tiquejenajaro. Tibodidenipi: –Pohuadeni cacahuade jipera onaraha ohua icadossemanadsade –tiquinejeraji. Pohuadeni cacahuade iboraqquri tiquinana, pina Dio jipa tahiccassa tinanamana. Tibodideni naqui: –Dsiniro huemani ohuadsa tojadsana pohuadeni cacahuade ojanijine –tiquinejeraji. Tibodideni bicaqquri nadsa pohuadeni acco acco titicanabaqquimana nana, onajaro. ³Tibodidenipi: –Ohuana pohuadenidsa deni ojana –tiquinejeraji. Pina ajima tiquinana bica tani: Bicaqquri tiquinadsa timadimananissa taji. Nadsapa ticcadeni mamari tabaqqui ticcadeni madie qqui toquinadsa pina ticcadeni madiessa quinahijine. ⁴Nema tiquinadsapi ia Cacahuade deni tojahicca Jesocristo ccnipomadsa pocca deni tojehe tiadenidsa inaridsanitohui. Najaro pocca daniji bicanipi jiquejeranitohui.

⁵Dsabissodeni tiadeni naqui Jesodsa jehe quinajarideni cacahuade attidenidsa iboraqquri tiquinaji, onajaro. Huapima tiadeni deni tinanamana-jeradsa mohuaradsa timecotedenidsa ahuaji ibora ahuaji ibora tiquinana. Aji Dio Atti dsodo napojarodsapi ajima najaro:

–Diopa madija: “Ohuana deni ojani, nahatojide ojirani” quinajaridenidsa jipera tahi.

Naraha madija: “Ohuapi ajimani ojani” quinajaridenidsana huati huana tadsa acco icamabaqqui tahi.

⁶Nadsapi tibodideni: –Ohuapi ajimani ojani –titiquina nadsapi Dio Dacorabotedsa iboraqquri tiquinaji. Nadsapi nidsa dsotode Dio Pohua jipa tahicca huada bacco tadsana

Pohuapa tiadeni deni tonanabaquihitohui. ⁷Diopa titohuideni huati cahanari canajarijine tiadeni tohuacahuabaquui-dsanapojari. Nadsapi Pohuadsa tettideni: –Abi Dio, obodi huatoto cananicca tinahireji. Pina ocappinanicca, oji onanicca, ocappiranicca naqui huapima obodidsa nohueranijine epeje tinanaji –titiquina nana, onajaro.

⁸¡Paji, tinoccodeni panaji! Diocca huadi, ticcadeni huadi naco *Satanapa pina dsomaji imehibotessa najari. Ia quino nahijine totororo naridsajari. Tibodideni



huatoma-mananissa taji, Satana tiadeni tonatabaccora-baquijarahijine. ⁹Dacoraquuri tiquinadsa ticcadeni huadidsa tiejidsamanaji. Diodsara disseraquuri tiquinaji, ticcadeni jeheniji todacorani nanijine. Ajijaro imapi nahatoquuri tiquinani: Timecotedeni dsama huapimadsa madiridsamanajari naco tiadenissa quinajari. Ocasserehe ihinahanamana najaro.

¹⁰Jidapana ocasserehe tinahanamanaccani. Naraha nidsa jicadsapi Dio tiadeni tonabicabaquihissa tahitohui. Ticcadeni jeheniji inapajiranissa tanitohui. Tibodideni inadacora-baquunitohui. Jesodsas disseraquuri tiquinanijine

tiadeni acco tocamabaquihitohui. Abi Diopa huati cahanari canadsa pocca cacahuehe bicanidsa imadidsanaponijine ia tocattejidsabaquijari. Jesocristo tedseje Diocca deni tojehedsa imadi-dsanapunitohui. ¹¹Pocca dacorehe nema dsanapunitohui. Pajissa nema nana.

Imecotedeni ohuaha naco tiadenidsa nija quinajari

¹²Ohuemecote Silvanopa bica tajari. Jesocristodsa dissera tahi. Pohuapa ohua acco camadsa ajijaro ima badsira tehe tiadenidsa dsodo onajaro, tibodideni acco ocambaquiniijine onadsa. Dio titohuideni huati cahanari canahi pajissa nahatoquuri tiquinanijine tiadenidsa dsodo onajaro. Pohuapa tiadenidsa ima bicani inanadsapi pocca tohuati huanehe ahua to inajaro. Najaro pocca tohuati huanehedsa disseraquuri tiquinaji, onajaro.

¹³Odsa panani *Romahuaji Jesodsas jehe quinajaridenipa tiadenidsa nija quinajari. Pohuadenipa Dio icattejidsabaquijari, pocca madija toquejenahijine. Pina Dio tiadeni tocattejidsabaquijarissa quinajari. Ohuemecote Maraco naco tiadenidsa nija najari. Pohuapa pina occa ejedenissa najari.

¹⁴Ohuatti onihi naqui: Tiadeni naqui titesse jehe quinajarideni tedseje bacco ticaniredsapi tetideni huanehema nija tiquinadsa dama, ticahuajacossa titiquina naji, onajaro.

Jesocristodsa tiquejenajaro huapimadsa Diocca jonehe tojaridsana, onajaro.

Epejeni, occa ima. Ohua onipi Pedro.